

आकाशवाणी जयपुर-अजमेर
प्रादेशिक समाचार
दिनांक 17.09.2024 समय: 18.45 बजे

- नरेन्द्र मोदी सरकार रा तीजा कार्यकाल रा एक सौ दिन आज पूरा व्ह्या।
- प्रधानमंत्री नरेन्द्र मोदी रा जन्मदिन रे मौके आज स्वच्छता ही सेवा अभियान सरु करी ज्यो।
- मुख्यमंत्री भजन लाल शर्मा मुख्यमंत्री रोजगार उत्सव मांय विकास रा डोढ़ हजार ऊं बत्ता कामां री नींव रखी अर पूरा व्ह्या काम जनता ने सूप्या-मां वाउचर योजना री सरुआत कीनी-नुवा नौकरी लाग्या कर्मचारियां ने नियुक्ति पत्र सूप्या।
- प्रदेश रा ऊगणी हलकां मांय ओजू तेज बारिश व्ही-आवता दो-तीन दिन बिरखा मांय बधोतरी रा आसार।

000

नरेन्द्र मोदी सरकार रा तीजा कार्यकाल रा 100 दिन आज पूरा व्हे ग्या। ई मौके प्रधानमंत्री कह्यो के वां रा तीजा कार्यकाल रा पहला एक सौ दिन सगळा सारु विकास ले र आया हैं। वे कह्यो के ई दौरान लिया ज्या केई खास फैसलां ऊं जनता री जिंदगी माथे चौखो असर पड्यो अर साल 2047 ताई विकसित भारत बणावण बाबत मजबूत नींव रखी ज्यी। केंद्रीय गृहमंत्री अमित शाह कह्यो के नरेन्द्र मोदी सरकार देश री हिफाजत री प्रणाली ने मजबूत बणा र सुरक्षित भारत बणायो है। वे नई दिल्ली मांय खबरनवीसां सागे बातचीत करता थकां कह्यो के सरकार लारला दस साल मांय देश ने बरकत रा गेला माथे ले जावण सारु सगळा जरूरी जतन कीना है। रक्षा मंत्री राजनाथ सिंह कह्यो के सरकार भारत ने रक्षा हलका मांय खुद रे पाण ऊबो करणो तय कीनो है। नरेन्द्र मोदी सरकार रा एक सौ दिन रा कामकाज री सराहवणा करता थकां रक्षा मंत्री कह्यो के लारला तीन महीनां मांय रक्षा मंत्रालय डोढ़ लाख करोड़ रूप्या री रक्षा खरीद री मंजूरी दीनी है।

000

लोकसभा अध्यक्ष ओम बिरला आज प्रधानमंत्री नरेन्द्र मोदी रा जन्मदिन रे मौके पौधा रोप्या अर पार्क मांय सफाई अभियान चला र साफ-सफाई राखण रो संदेश दीनो। वे सोशल मीडिया प्लेटफॉर्म एक्स रे जरिये प्रधानमंत्री मोदी रा बेहतर स्वास्थ्य अर लम्बी उम्र री कामना कीनी। राज्यपाल हरिभाऊ बागडे प्रधानमंत्री नरेन्द्र मोदी रा जन्म दिन रे मौके वां ने बधाई अर शुभकामनावां दीनी है। वे प्रधानमंत्री रा स्वस्थ अर लम्बा जीवन री कामना कीनी। बागडे कह्यो के प्रधानमंत्री नरेन्द्र मोदी री अगुवाई मांय देश मांय विकास रा सगळा काम व्ह्या है। बांसवाड़ा मांय ई प्रधानमंत्री रा जन्मदिन रे मौके न्यारा-न्यारा कार्यक्रम राख्यी ज्या। सवाईमाधोपुर मांय खूनदान शिविर लगायी ज्यो। हनुमानगढ़ मांय ई मौके सेवा से सीखें कार्यक्रम सरु करी ज्यो।

0000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पैला 100 दिनां मांय करी ज्या खास कामां रा बारा मांय जाणकारी देवण सारु आज ऊं समाचार बुलेटिन मांय खास श्रंखला चलायी जा रही है। ई रा तैत आज पेश है खेती-किसानी सारु केन्द्र सरकार रा कामां री जाणकारी -

प्रधानमंत्री नरेन्द्र मोदी रा तीजा कार्यकाल रा पहला फैसला रा तौर ऊं पीएम किसान सम्मान निधि रा तैत 9 करोड़ 30 लाख किसानां ने 17वीं किस्त रा तौर ऊं 20 हजार करोड़ रूप्या दिया ज्या। किसानां ने उपज रो वाजिब अर फायदेमंद मोल दिरावण सारू मौजूदा माली साल मांय सिंयाळू साखां सारू सरकारी मोल मांय बधोतरी करी ज्यी है। खेती-बाड़ी रा काम ने मजबूत बणावण अर किसानां री मदद सारू कृषि बुनियादी ढांचा कोष ने बधावण अर डिजिटल तकनीक ऊं खेती ने नुवी बणावण बाबत् डिजिटल कृषि मिशन ई सरू करी ज्यो। काश्तकारां ने सस्ती खाद मुहैया करावण सारू खाद कम्पनियां बाबत् साढे तीन हजार रूप्या प्रति मीट्रिक टन वाळो खास डीएपी सब्सिडी पैकेज जारी करी ज्यो।

000000

देश मांय आज "स्वच्छता ही सेवा" अभियान सरू करी ज्यो। दो अक्टूबर ताई चालण वाळा ई अभियान रो ई साल रो मुद्दो "स्वभाव स्वच्छता-संस्कार स्वच्छता" राखी ज्यो है। प्रदेश मांय ई स्वच्छता ही सेवा अभियान रा तहत न्यारा-न्यारा कार्यक्रम राख्या जा रह्या है। झुन्झुनूं जिला मांय राखी ज्या कार्यक्रम मांय उपराष्ट्रपति जगदीप धनखड़ कहयो के प्रधानमंत्री नरेन्द्र मोदी कानी ऊं सफाई सारू जनता री भागीदारी री अपील देश मांय बदलाव री निशाणी बण गी है। धनखड़ सफाई ने स्वभाव, संस्कार अर संस्कृति ऊं जोड़बा रो संकल्प लेवण बाबत् कहयो। स्वच्छ भारत अभियान री उपलब्धियां रो जिक करता थकां उपराष्ट्रपति कहयो के देश रा हर घर मांय शौचालय बणावण री प्रधानमंत्री नरेन्द्र मोदी री पहल ऊं आयो बदलाव भारत री बरकत रा काम मांय घणो खास सबित व्हयो है।

मुख्यमंत्री भजनलाल शर्मा आज जयपुर मांय मालवीय नगर पुलिया कने सफाई कर र प्रदेश मांय 'स्वच्छता ही सेवा' अभियान री सरूआत कीनी। ई मौके मुख्यमंत्री जनता ने ई साफ-सफाई री शपथ दिरायी।

ई मौके मुख्यमंत्री कहयो के आज प्रधानमंत्री नरेन्द्र मोदी रा जन्मदिन ऊं सरू व्ह्या 'स्वच्छता ही सेवा' पखवाड़ा रा तैत 2 अक्टूबर ताई पूरा राज्य मांय मिल र श्रमदान करण रे मार्फत गांवां अर शहरां मांय सफाई करी जावेला। वे सफाई मित्रां ने आयुष्मान कार्ड ई दीना। मुख्यमंत्री नगर निगम रा दो एप्प 'रिसाइकिल' अर 'जयपुर 311' री सरूआत ई कीनी। 'रिसाइकिल एप' रे मार्फत घर ऊं ही सूखो कचरो श्रेणीवार भेळो कर्यो जावेला। जयपुर 311 एप रे जरिये जनता निगम ऊं जुडी परेशानियां रा निपटारा सारू अर्जी दे सके है। डीग मांय जिला कलेक्टर जलमहल परिसर मांय गोपाल सागर तालाब रे किनारे साफ-सफाई कर र अभियान री सरूआत कीनी। कोटा मांय संभागीय आयुक्त लोगां ने साफ-सफाई राखण री शपथ दिरायी। पाली मांय संभागीय आयुक्त सेल्फी प्वाइंट माथे फोटो ले र सफाई राखण रो संदेश दीनो। बाडमेर जिला रा प्रभारी मंत्री जोराराम कुमावत अहिंसा चौराहा ऊं अभियान री सरूआत कीनी। सांचौर मांय जनता रा नुमाइंदा, सरकारी अहलकार अर कर्मचारी जनता सागे श्रमदान कीनो।

00000

राष्ट्रपति द्रौपदी मुर्मू पाणी बचावण, उन्नत प्रबंधन, विकास अर वितरण रो लक्ष्य हासिल करण सारू जनता रा आंदोलन ने बधावो देवण री जरूरत माथे जोर दीनो है। वे आज नई दिल्ली मांय आठवां भारत जल सप्ताह रा उद्घाटन रे मौके बोल रही ही। राष्ट्रपति पाणी बचावण री भेळी कोशिशां ने घणी खास बताई। राष्ट्रपति कहयो के भारत रा जूना धर्मग्रंथां मांय हजारो साल पैली ई पाणी बचावण रो जिक मिले है।

.....

मुख्यमंत्री भजन लाल शर्मा आज जयपुर मांय राखी ज्या 'मुख्यमंत्री रोजगार उत्सव' समारोह मांय 10 हजार 376 करोड़ रूप्या रा खर्च वाळा विकास रा एक हजार 527 कामां री नींव रखी अर पूरा व्ह्या काम जनता ने संप्या। मुख्यमंत्री नुवी नौकरी लागण वाळा कर्मचारियां ने राज्य स्तर रा 'मुख्यमंत्री रोजगार उत्सव' कार्यक्रम मांय नियुक्ति पत्र दीना। ई मौके मुख्यमंत्री न्यारा-न्यारा जिला मांय नुवी नौकरी लागण वाळा नौजवानां सागे वर्चुअल तरीका ऊं बातचीत ई कीनी। वे मां वाउचर योजना री सरूआत ई कीनी।

कार्यक्रम मांय पीएम कुसुम योजना रा तहत 5 हजार 254 करोड़ रुपया रा खर्च वाळी 608 परियोजनावां री नींव ई राख्थी ज्यी। गांवाई हलकां मांय पीएम आवास योजना रो फायदो लेवण वाळा 1 लाख 45 हजार लोगां ने ई आवास स्वीकृति पत्र दिया ज्या। कार्यक्रम मांय मुख्यमंत्री कह्यो के वां रा राज मांय हाल ताई 41 हजार नौकरियां दे दीरीजी है अर प्रदेश रा नौजवानां ने चार लाख ऊं बत्ती सरकारी नौकरी दी जावेला। **झालावाड़, बारां, नागौर, हनुमानगढ़, जालौर अर सिरोही** मांय ई मुख्यमंत्री रोजगार उत्सव राखण रा समाचार है। मुख्यमंत्री भजनलाल शर्मा कह्यो के बजट मांय करी ज्या ऐलाण माथे लगातार काम कर्या जा रह्या है। वे पेपर लीक रा मामलां रो जिक्र करता थकां कह्यो के दोषियां रे खिलाफ करड़ी कार्रवाई करी जावेला।

.....

कार्यक्रम मांय चिकित्सा मंत्री गजेंद्र सिंह खीवसर कह्यो के प्रदेश रा किसानां ने अब रात री बगत खेतां मांय पाणी देवण री परेशानी ऊं बेगी ई निजात मिलेला।

00000

उद्योग मंत्री राज्यवर्धन सिंह राठौड़ संयुक्त अरब अमीरात रा निवेशकां ने राजस्थान मांय निवेश रा मौकां रो फायदो उठावण री अपील कीनी है। वे निवेशकां ने भरोसो दिरायो के राज्य मांय स्थिर सरकार है अर आवता करीब चार साल ताई निवेशकां ने बरकत रो पूरो मौको मिलेला। वे आज यू.ए.ई. रा दुबई मांय निवेशकां ने राजस्थान मांय निवेश करण बाबत् न्यौतो देवण सारु राख्थी ज्यी मीटिंग मांय बोल रह्या हा। ई मौके संयुक्त अरब अमीरात मांय भारत रा महा वाणिज्य दूत सतीश कुमार सिवान कह्यो के भारत अर संयुक्त अरब अमीरात रा आपसी रिश्ता रा सकारात्मक पहलू ऊं निवेशकां ने राजस्थान मांय घणो फायदो व्हेला। दुबई मांय प्रसार भारती रा खास संवाददाता विनोद कुमार बतायो के प्रतिनिधि मंडल कृषि उत्पाद प्रसंस्करण, औद्योगिक पार्क, खनन, पेट्रो रसायन, कपड़ा अर पर्यटन सरीखा हलका मांय भारत रा मजबूत पक्ष री जाणकारी दीनी। मीटिंग रा आखिर मांय राजस्थान सरकार अर संयुक्त अरब अमीरात रा कारोबारी घराणां बीचे न्यारा-न्यारा करार माथे सही करीजी।

00000

प्रदेश रा ऊगणी जिलां मांय बिरखा रो दौर ओजू सरु व्हे ग्यो है। भरतपुर अर धौलपुर जिलां मांय दोपहरां पाछे एक ऊं दो घंटा ताई जोरदार मेह बरस्यो, जिण ऊं नीचला हलकां मांय पाणी भर ग्यो। झुंझुनू, भीलवाड़ा, नागौर, करौली, पाली अर अजमेर जिलां मांय ई कठे-कठे छांटो-छिड़को व्हेवण अर हल्की बिरखा रा समाचार है। मौसम विभाग रे मुजब प्रदेश मांय आवता दो-तीन दिन बारिश मांय बधोतरी रा आसार है। महकमो काल जयपुर, भरतपुर, कोटा, अजमेर अर उदयपुर संभाग मांय कठे-कठे बिरखा व्हेवण अर भरतपुर संभाग मांय कठे-कठे भारी बारिश रा आसार है। 19 सितंबर ने ई बादळां री गाज सागे कठे-कठे हल्की बिरखा री संभावना है।

00000

खाद्य प्रसंस्करण मंत्रालय गुरुवार ऊं नई दिल्ली मांय वर्ल्ड फूड इण्डिया उत्सव राखेला। तीन दिन रा ई आयोजन रे दौरान खाद्य प्रसंस्करण हलका सागे ई इण ऊं जुड़्या न्यारा-न्यारा हलकां रा बारा मांय जाणकारी दी जावेला। ई मौके खरीददारां अर बेचण वाळा री मीटिंग ई राख्थी जावेला अर न्यारा-न्यारा देशी खान-पान ई मुहैया कराया जावेला। कार्यक्रम रे दौरान खाणो बणावण री होड़ राख्थी जावेला अर स्टार्ट अप ग्रैंड चैलेंज 2.0 राख्यो जावेला।

00000

प्रदेश मांय आज अनंत चौदस पर्व मनायी ज्यो। ई मौके केई ठोड़ां गणेश चौथ ऊं सरु व्ह्या गणेश महोत्सव रा तैत बिठायी ज्यी गजानंद जी री मूर्तियां ने पूरा विधि-विधान ऊं जलाशयां मांय विसर्जन करीजी। बाड़मेर मांय गाजा-बाजा सागे शोभायात्रा निकाल र गणेश जी री मूर्तियां ने तळावा मांय विसर्जित करीजी। सवाईमाधोपुर मांय अखाड़ाबाजां रा करतब सागे शोभायात्रा निकाली ज्यी। जैन मिन्दरां मांय ई आज दशलक्षण पर्व पूरो व्हेवण रे मौके मोटी तादाद मांय जातरु पूग्या। सीकर मांय नसियां जी अर पूजा-पाठ री दूजी ठोड़ां श्रावक उत्तम ब्रह्मचर्य धर्म अर अनन्त चौदस री पूजा कीनी।

00000

प्रधानमंत्री नरेन्द्र मोदी ई महीना री 29 तारीख ने आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 114 वीं कड़ी व्हेला। आप ई आप रा विचार 27 सितंबर तांई मुफ्त नंबर 1 8 0 0 – 1 1 – 7 8 0 0 माथे भेज सको हो। ई सागे ई 1922 नम्बर माथे पर मिस्ड कॉल दे र एस. एम. एस. ऊं मिल्या लिंक रे ज़रिए ई राय दी जा सके है। नरेन्द्र मोदी एप या माई जी.ओ.वी. ओपन फोरम रे जरिये ई राय दी जा सके है।

00000